

فينك .. يا بلد..!؟

باعتب عليك يا بلدى ودموعى  
من أساكى بحور  
ناسيانى دايمى كدا ليه وعارفه  
إن الجناح مكسور  
شايفا إن طريقى كله ضلمه  
ومافى طاقة نور  
الغنى فيكى عايش وساكن  
فى قلل وقصور  
وأنا ومعايا أولادى فى عشه  
وكأنها طرب وقبور  
الظالم سايباه يظلم فيا وكمان  
قادر ومتعافى  
إن قتلته أه.. يغضب منى كأن  
عذابى مش كافى  
هوا ينام على حرير سندسى  
وأشيله على اكتافى  
وأنا المسحول.. والأرض هيا  
فرشتى والسما لحافى  
عيونى من كتر البكا نشفت  
وملحها مرار صافى

هوا انتی کل ده وبرضو مش  
داریانه ولا سمعانی  
أشکيلك همومی وأوجاعی  
ولا حتی طایقانی  
طیب أروح فین قولیلی بس  
والدنیا ماهش ساییانی  
منین ما أروح غیر مرغوب فیا  
وارجعلك هنا تانی  
أنا المجنی علیه دایما وتقولی  
إنی أنا الجانی  
واسمعك تقولیلی إصبر .. ولیه  
دایما الصبر من کومی  
وحنانك لغيری بالزوفة تهدیه  
وعندی أنا تصومی  
خلیتینی زهقت من أحوالی  
وولعت فی هدومی  
مش لاقی رغیف العیش وغیری  
يجزع من الرومی  
نفسی تبصیلی مره بعین العدل  
وتحسی بآلمی وهمومی